

COBIE DA 'NCURNISÉ

*Oh, ma varda che 'd tapage
ch'a-i è 'ncheuj ant nòst pais,
selebroma 'd bej mariage,
tuta gent da gran curnis.*

*Luca, nòst prim sitadin
a-j veul bin à soa gent;
l'è 'n simpàtich pensierin,
na manera 'd feje content.*

*Nòsse d'òr, ëd diamant, ëd brilant:
a-i na j'è pèr tuti ij gust,
a son tuti bin vajant,
gnanca un ch'a pòrta 'l bust.*

*Ancheuj a son rapresentà
ij mesté ëd nòsta Busca:
agricoltura e artigianà,
comerciant...mach gent ch'a rusca.*

*Gent ch'a l'era pèr so cont,
ovrié o 'mprenditor,
dè dsà e dè dlà 'd nòst bel pont
son fiori 'dcò j'ispetor!*

*Sinquant'ani tuti d'ën fià
son na cifra da 'nvidié,
che message ai mal marià...
a rësté 'nsema a-i va 'd topé!*

*Son pa staite reuse e fior,
l'han pairà a cicotié,
ma 'l segret dël ver amor
l'è savèisse soporté.*

*Èl travaj l'è dësmentià,
la pension l'è lòn ch'a l'è,
minca tant a manca 'l fià*

e ij novod a fan tërlé!

*Sessant'ani a l'onor dël mond,
con ëd di bej da ricordé,
chili brut a stan sël fond,
l'è pa 'l cas ëd pioraulé.*

*Rësté 'nsema seriament
a richied ëd sacrificissi,
cara gent deme da ment
a-i va 'd pasiensa e tant giudissi.*

*Për rispondi a jë stordì
ch'a buto mal ant le famije,
dedicomje cost bel dì,
fomje fé dle meravigje.*

*Se 'd brilant a l'è 'l mariage,
a veul dì stant'ani 'nsema,
s'a l'è 'l cas foma 'n bel viage...
andoma tuti a piòte 'n Lema.*

*L'è passajne d'eva 'd Maira
sota ij pont ëd nòst pais,
a l'è 'ndajne 'dcò a la sgaira
tra fatighe e quai soris.*

*E a la fin mia cara gent,
festegioma sti giovnòt,
preparomse a molé ij dent
con un batiman a sti cobìot.*

*E Nosgnor, con tut so amor,
ch'a-j congela sì sla tera,
noi j'ofroma mach un fior
con tanta pas e gnente guera.*